

Bruder Horatio warten fleißig auff ir hut/ vnd hatten bey sich ein außserlesen hauffen Volcks/ den iren da es noth thete/ zu hülff zukommen/ vnd den Feind zu ruck zu treiben. Mit diesem hauffen zog gemelter Beer durch die myne in die faulße Bräue/ all da er des Erzhertz. volck mit grossem geschrey angefallen/ vnd zu drey malen zu ruck geschlagen. Dan so oft sie wider mit frischem volck heran kamen/ mußte sie allzeit wider abweichen/ vnd konten mit iren spieß vnd büchsen wenig außrichten/ so dapffer empfiengen sie die Englische mit iren langen Dägen.

Es ist nicht ohn/ daß sich des Erzhertzogen Volck in diesem sturm vberal dapffer vnd mannlich sich erzeigt hat: jedoch weil in d' Statt auff ire ankunft gekocht vnd alle örter besetzt waren/ sind sie dermassen empfangen vnd tractiert wordē/ daß vielen diß ir letzte malzeit gewesen: im solcher maß das da sie mehr ankomen weren/ in allhie eben solte gangen seyn wie iren mitgesellen so auff den halben Mon jenseit der Geule an der Ostseyten gestürmt hatten. An der Ostseyten ist der sturm wol 2. stund zu spat angangen/ also daß das Wasser widerumb anfieng zu wachsen: darab sie sehr erschracken / weil sie vor augen sahen vnd merckten/ daß wofern sie lenger allda verharren wurden/ ihnen nicht leichtlich von den ihren würde können geholffen werden. Seind derowegen wider ab vnd zu ruck gezogen/ in welchem abziehe ein grausamer Mord vnder ihnen geschehen so wol von dem groben geschütz als den Musteten vnd rohren. Der gleichen anfall hat des Erzhertzogen volck auch auff die Bollwerckē Helmunt/ Porcespieß/ vnd fort auff alle Englische trenchen od schanzen (welche der General Beer mit fleiß mit wenig volck besetzt hatte) gethan/ vnd die trenchen zwar namen sie leichtlich ein/ aber

aber